

# 單子知陳必亡

維基文庫，自由的圖書館

< 國語  
< 古文觀止

## 單子知陳必亡

定王使單襄公聘于宋，遂假道于陳以聘于楚。火朝覲矣，道莽不可行，候不在疆，司空不視塗，澤不陂，川不梁，野有庾積，場功未畢，道無列樹，墾田若蓺，膳宰不致饌，司里不授館，國無寄寓，縣無旅舍，民將築臺於夏氏。及陳，陳靈公與孔寧、儀行父南冠以如夏氏，留賓弗見。

單子歸，告王曰：「陳侯不有大咎，國必亡。」王曰：「何故？」對曰：「夫辰角見而雨畢，天根見而水涸，本見而草木節解，駟見而隕霜，火見而清風戒寒。故先王之教曰：『雨畢而除道，水涸而成梁，草木節解而備藏，隕霜而冬裘具，清風至而修城郭宮室。』故夏令曰：『九月除道，十月成梁。』其時儆曰：『收而場功，徯<sup>[1]</sup>而畚梏！』營室之中，土功其始；火之初見，期于司里。此先王所以不用財賄，而廣施德於天下者也。今陳國火朝覲矣，而道路若塞，野場若棄，澤不陂障，川無舟梁，是廢先王之教也。

「固制有之曰：『列樹以表道，立鄙食以守路。國有郊牧，囿<sup>[2]</sup>有寓望，藪有圃草，囿有林池，所以禦災也。其餘無非穀土，民無縣<sup>[3]</sup>耜，野無奧草；不奪農時，不蔑民功；有優無匱，有逸無罷；國有班事，縣有序民。』今陳國道路不可知，田在草間，功成而不收，民罷于逸樂，是棄先王之法制也。

「《周》之《秩官》有之曰：『敵國賓至，關尹以告，行理以節逆之，候人為導，卿出郊勞；門尹除門，宗祝執祀，司里授館，司徒具徒，司空視塗，司寇詰姦，虞人入材，甸人積薪，火師監燎，水師監濯，膳宰致饗，廩人獻餼，司馬陳芻，工人展車，百官以物至，賓入如歸。』是故小大莫不懷愛。其貴國之賓至，則以班加一等，益虔；至于王吏，則皆官正泣事，上卿監之；若王巡守，則君親監之。今雖朝也不才，有分族于周，承王命以為過賓于陳；而司事莫至，是蔑先王之官也。

「先王之令有之曰：『天道賞善而罰淫，故凡我造國，無從匪彝，無即慆淫，各守爾典，以承天休。』今陳侯不念胤<sup>[4]</sup>續之常，棄其伉儷妃嬪，而帥其卿佐，以淫于夏氏，不亦瀆姓矣乎？陳，我大姬之後也。棄袞冕而南冠以出，不亦簡彝乎？是又犯先王之令也！昔先王之教，懋帥其德也，猶恐隕越；若廢其教而棄其制，蔑其官而犯其令，將何以守國？居大國之間，而無此四者，其能久乎？」

六年，單子如楚。八年，陳侯殺于夏氏。九年，楚子入陳。

## 註釋

- ↑ 字形為「左彳右侍」。
- ↑ 囿，同「疆」。
- ↑ 縣，同「懸」。

#### 4. ↑ 胤，原字少「乚」。Unicode:2664D

定王：周襄王之子。單襄公：周卿，名朝。火朝覲矣：謂火星見於早上。道蒨：謂道路長滿雜草，難以通行。候：掌迎送賓客之官。司空：掌水土之官。塗：道路。澤不陂：謂湖上不設障。川不梁：河上不架橋。庾積：外露的米穀。場功：指收禾。蓺：茅芽。餼：牲畜及禾米。夏氏：即夏徵舒，陳國大夫。陳靈公：陳國國君，名平國。孔寧、儀行父：二人皆陳國大夫。辰角：星名。天根：星名。木：星名。草木節解：謂草木枝節脫落。駟：星名。除道：闢治道路。俦而畚揭：謂預備器具以盛載泥土。奧草：長草。鄙：四面的邊邑，每十里有廬，廬有飲食。守路：謂以飲食守候路人。薑：同「疆」。藪：沼澤。圃：興盛。囿：有圍牆的園林。望：候望之人。民無縣耜：謂農具皆給民眾用以耕種，並沒有懸掛不用的。有優無匱：有餘無乏。有逸無罷：安逸而不疲勞。班事：謂事農有條理也。行理：掌朝覲聘問之官。節：符節，以示誠信之物。逆：迎。司徒：掌禮教導民之官。具徒：供養徒役，而教其修路。司寇：掌刑罰之官。詰姦：詰禁奸盜。虞人：掌山澤之官。甸人：掌野物之官。廩人：掌出納米穀之官。司馬陳芻：謂掌圉人之官供給乾草。工人展車：謂工匠審察客車。朝：單襄公的名。造國：建造國家。匪彝：違背倫常的行為。愒淫：放縱而無限度。胤續之常：繼嗣的常法。簡彝：謂忽略其常服也。懋：勸勉。楚子：即楚莊王。



本作品在全世界都属于公有领域，因为作者逝世已经超过100年，并且于1923年1月1日之前出版。

取自“<http://zh.wikisource.org/wiki/%E5%96%AE%E5%AD%90%E7%9F%A5%E9%99%B3%E5%BF%85%E4%BA%A1>”

1个分类: PD-old

- 此页面最后修订于2008年9月20日 (星期六) 16:46。
- 本站的全部文字在知识共享 署名-相同方式共享 3.0协议之条款下提供，附加条款亦可能应用。（请参阅使用条款）  
在部份国家和地区，包括中国大陆、澳门和台湾，作者精神权（含署名权）永久有效（详情）。  
Wikisource®和维基文库标志是维基媒体基金会的注册商标；维基™是维基媒体基金会的商标。  
维基媒体基金会是在美国佛罗里达州登记的501(c)(3)免税、非营利、慈善机构。
- 隐私政策
- 关于维基文库
- 免责声明